

**2023KO UZTAILAREN 20AN UDALBATZA OSOAK EGINDAKO OHIKO
BATZARRALDIAREN AKTA.**

LEKUA: Beasaingo Udaletxea

ARETOA: Batzar Aretoa

EGUNA: Hogeia

HILABETEA: Uztaila.

URTEA: Bi mila eta hogeitahiru

HASIERAKO ORDUA: Arratsaldeko seietan

BATZARRALDIAREN IZAERA: Apartekoa

DEIALDIA: Lehena

OSATZEN DUTEN PARTAIDEEN KOPURUA: Hamazazpi (17)

UDALBURUA: LEIRE ARTOLA UGALDE

BILDUAK:

EAJ-PNV

- ADUR UGARTEMENDIA LEUNDA
- AINHOA ARRESE ARRATIBEL
- MARIOLA PASCUAL PAREDES
- EDORTA DIAZ DEL RIO
- MARIA ELENA RUIZ ZABALA
- MICHEL VENTUREIRA IRIZAR
- OLATZ ARRESE IMAZ
- AITOR ALDASORO ITURBE

BEASAINGO EH BILDU

- HASIER AGIRRE ELKOROBerezibar
- NEREA MANZISIDOR MENDIZABAL
- AITOR URDANGARIN IRASTORZA
- YOLANDA HERNANDEZ RODRIGUEZ
- IKER URTEAGA REBOLLAR

Socialistas Vascos-Euskal Sozialistak

- EVA ALVAREZ ATANES
- ANGEL REDONDO FERNANDEZ

ELKARREKIN PODEMOS EZKER ANITZA / IU-ALIANZA VERDE

- WESLEY ARITZ CORSITTO AGIRRE

IDAZKARIA: ITZIAR AROZTEGUI APAOLAZA

Bileran ere parte hartu du Lurdes Alegria Lasa Kontuhartzaileak eta Idoia Noble interpretariak.

1.- AURREKO AKTA. 2023ko uztailaren 6ko aktaren onespena.

Ezagutzero eman ondoren 2023ko uztailaren 6ko akta, aho batez onartu da berarekiko zer esanik ez dagoelako.

2.- LURRALDE BATZORDEKO PROPOSAMENAK:

- BEASAINGO ONDARRE 29. EREMUKO E LURZATIAREN XEHETASUN AZTERLANAREN BEHIN BETIKO ONESPENA. 2023AEST0001

Ezagutzero eman da, 2023-07-13ko Lurralde Batzordeko proposamena, hau da:

AURREKARIAK

I.- 2023eko maiatzaren 10ean, Alkateak hasierako onspena eman zion aipatutako Xehetasun Azterlanari.

II.- 1/2006 Foru Dekretuaren 94.2 artikuluan xedatutakoaren arabera, aipatutako Xehetasun Azterlana digital formatuan igorri zen Foru Aldundiko Errepide Departamentura, aginduzko txostena emateko eskaera eginez.

Aldeko txotenak, erregistro elektronikoan sarrera izan zuen, 2023ko maiatzaren 26an.

III.- Ebazpena sustatzaileari jakinarazi zitzaion eta espedientea jendaurrean jarri zen hogei laneguneko epean ondorengo egunkari eta aldizkari ofizialean iragarkiak argitaratuz: Berria, Diario Vasco eta Gipuzkoako Aldizkari Ofizialean, 2023-05-12an, 2023-05-16an eta 2023-05-19an, hurrenez hurren.

Aipatutako jendaurreko epean ez da inolako alegaziorik aurkeztu

OINARRI JURIDIKOAK

Legeri aplikagarria xehetasun hauetan aurreikusten da:

- Hirigintza Plangintzako Erregelamenduaren 65., 66. eta 140. Artikuluak.
- Lurzoruari eta Hirigintzari buruzko ekainaren 30eko 2/2006 Legearen 73., 74. eta 98. artikulua.
- Toki Araubidearen Oinarriak arautzen dituen Legearen 22, 2c), artikulua.

Horren ondorioz, Lurralde Batzordeak Udalbatza Osoari gehiengo soilarekin onartzeko nahikoa den ondorengo erabaki-proposamena egiten dio.

Lehenik. Beasaingo Ondarre 29 areako E lursailaren Xehetasun Azterlanari behin betiko onspena ematea.

Bigarren. Erabaki honen berri sustatzaileari ematea eta Gipuzkoako Aldizkari Ofizialean argitaratzea.”

- BEASAINGO ONDARRE 29. EREMUKO D LURZATIAREN XEHETASUN AZTERLANAREN BEHIN BETIKO ONESPENA. 2023AEST0002

Ezagutzera eman da, 2023-07-13ko Lurralde Batzordeko proposamena, hau da:

“AURREKARIAK

I.- 2023eko ekainaren 13an, Alkateak hasierako onespena eman zion aipatutako Xehetasun Azterlanari.

II.- 1/2006 Foru Dekretuaren 94.2 artikuluan xedatutakoaren arabera, aipatutako Xehetasun Azterlana digital formatuan igorri zen Foru Aldundiko Errepide Departamentura, aginduzko txostena emateko eskaera eginez.

Aldeko txotenak, erregistro elektronikoan sarrera izan zuen, 2023ko ekainaren 30ean.

III.- Ebazpena sustatzaileari jakinarazi zitzaion eta espedientea jendaurrean jarri zen hogeit laneguneko epean ondorengo egunkari eta aldizkari ofizialean iragarkiak argitaratuz: Berria, Diario Vasco eta Gipuzkoako Aldizkari Ofizialean, 2023-06-15ean, 2023-06-15ean eta 2023-06-20an, hurrenez hurren.

Aipatutako jendaurreko epean (2023-07-18an amaitu zen), ez da inolako alegaziorik aurkeztu.

OINARRI JURIDIKOAK

Legeri aplikagarria xehetasun hauetan aurreikusten da:

- *Hirigintza Plangintzako Erregelamenduaren 65., 66. eta 140. Artikuluak.*
- *Lurzoruari eta Hirigintzari buruzko ekainaren 30eko 2/2006 Legearen 73., 74. eta 98. artikulua.*
- *Toki Araubidearen Oinarriak arautzen dituen Legearen 22, 2c), artikulua.*

Horren ondorioz, Lurralde Batzordeak Udalbatza Osoari gehiengo soilarekin onartzeko nahikoa den ondorengo erabaki-proposamena egiten dio.

Lehenik. *Beasaingo Ondarre 29 areako D lursailaren Xehetasun Azterlanari behin betiko onespena ematea.*

Bigarren. *Erabaki honen berri sustatzaileari ematea eta Gipuzkoako Aldizkari Ofizialean argitaratzea.”*

Alkate andreak (EAJ-PNV): “Bi proposamen ezberdin dira baina eremu berdinean eta egokitze lanak egiteko aurrera eraman behar den izapide urbanistikoa burutzean datza. Hain zuzen ere, aipatutako Xehetasun Azterlanen behin betiko onespena ematea.

Alde batetik “Industrias Electromecánicas GH” enpresak, produktu kimikoak biltegitratzeko egokitu behar ditu bere instalazioak eta bestetik “Talleres Mecánicos Arri” enpresak eraiki nahi du biltegi inteligente bat. Horretarako, esan bezala, Xehetasun Azterlanen behin betiko onespena ematea dagokio, proposamenetan adierazitako aurrekariak kontuan izanda.

Hitz egiteko txanda eman ondoren, bildutakoek proposamenarekiko iritzia hauek azaldu dituzte:

Nerea Manzisidor Mendizabal andreak (Beasaingo EH Bildu): “Ados gaude baina jaso ditugun dokumentuak erdara hutsean jaso ditugu. Aurreko legealdian ere aipatu genuen. Ahal den neurrian, behintzat, euskaraz ere jaso nahiko genuke. Gero egingo dugun aitorpenarekin lotuta doa.”

Alkate andreak (EAJ-PNV): “Kasu honetan gertatzen dena da, sustatzaile pribatuak direla dokumentuak aurkeztu dituztenak. Ez da guk administrazio bezala eskatutakoa. Legez ez dut uste horrelakorik eskatu dezakegunik, baina egia da bidea egin behar dugula geroz eta gehiago administrazio euskaldunagoa eduki dezagun eta gure lan hizkuntza euskara izan dadin.

Beste guztiek adostasuna azaldu dute proposamenekiko.

Horren ondorioz, bozketa egin da eta aho batez onartu dira bi proposamenak.

3.- ALKATEAREN PROPOSAMENA

GOIEKIKO ADMINISTRAZIO KONTSEILUAN PARTE HARTZEKO ORDEZKARIAK IZENDATZEA. 2023IDBO0010

Alkate andreak (EAJ-PNV): “Aurreko bileran gai hau onartzeke geratu zen. GOIEKI sortu zenetik duen espirituari jarraituz, bertan eskualdean dauden talde politiko guztiak, Administrazio Kontseiluan presentzia eta ordezkaritza izatea da helburu. Horren arabera beste herriekin adostutakoa izan da, PODEMOSeko ordezkaria, Ordiziako zinegotzia izango da eta orduan proposatzen duguna da Beasaingo kasurako, gure hiru ordezkaritzak gainerako hiru talde politikoen esku uztea. Beraz, proposamena ondorengo da:

“Gaia: GOIEKIk Administrazio Kontseiluan parte hartzeko ordezkariak izendatzea:

Udalbatza Osoari proposatzen zaio, GOIEKIk Administrazio Kontseiluan parte hartzeko ondorengo ordezkariak izendatzea:

- LEIRE ARTOLA UGALDE (EAJ-PNV)
- HASIER AGIRRE ELKOROBEREZIBAR (BEASAINGO EH BILDU)
- EVA ALVAREZ ATANES (Socialistas Vascos-Euskal Sozialistak)”

Hitz egiteko txanda eman ondoren bildutakoek proposamenarekiko adostasuna azaldu dute.

Horren ondorioz, bozketa egin da eta aho batez onartu da proposamena.

4.- ERAKUNDE AITORPENA

EAJ-PNV eta Beasaingo EH Bildu udal taldeek aurkezten duen erakunde-adierazpena: Espainiako Auzitegi Konstituzionalak emandako Sententzia, udalei euskara hutsez aritzeko aukera zabaltzen dien 2016ko Udalen Legearen aurka.

Alkate andreak (EAJ-PNV) erakunde-adierazpenaren zati hau irakurri du:

“Gaia: Espainiako Auzitegi Konstituzionalak emandako Sententzia, udalei euskara hutsez aritzeko aukera zabaltzen dien 2016ko Udalen Legearen aurka.

“Hizkuntza eskubideen aurkako epaiaren aurrean”

Euskalgintzako eragileekin batera Udal honetako EAJ-PNVko hautetsiok, zera adierazi nahi dugu:

Espainiako Auzitegi Konstituzionalak Udal Legearen aurka, udalei euskara hutsez aritzeko aukera ezetsiz, emandako epaiak eragin digun kezka larriak ekarri gaitu idatzi hau aurkeztea.

Kezkagarria eta larria iruditzen zaigu sententzia euskararen normalizazio eta biziberritze prozesuari oztopoa jartzea delako, helburu horren alde udaletatik bideratzen diren hizkuntza-politikak guztiz mugatzen baititu. Bide batez esan, herritar guztien hizkuntz eskubideak bermatzen dituzten hizkuntza-politikak direla atzera bota diren horiek, ezetsi den Udal Legearen 6.2 artikulua berariaz jasotzen baitu berme hori.

Finean, euskara eta euskal hiztunak mespretxatzen ditu epai honek, eta euskarak normalizazio eta biziberritze bidean etorkizunera begira dituen desafio handiei aurre egiteko moduko hizkuntza-politikak indarrean jartzea eragozten du.”

Hasier Agirre Elkoroberezibar jaunak (Beasaingo EH Bildu), erakunde-adierazpenaren zati hau irakurri du:

“Eusko Legebiltzarrak kontsentsu zabalez onartu zuen orain baliogabetutako Udal Legea. Era berean, azken Inkesta Soziolinguistikoak argi erakutsi du gizartearen gehiengo zabal batek babesten dituela euskararen normalizazioa helburu duten politikak. Beraz, epai hori euskararen biziberritzearen aurkakoa ez ezik adostasun sozial handi baten kontrakoa ere bada. Azken batean, herritarren eta udalen erabakimena jartzen ditu auzitan. Erabakimen horren defentsan hona hemen ehunka alkate eta udal ordezkariaren presentzia.

Uste dugu epai hau oldarraldi judizial zabalago baten parte dela, hizkuntza gutxituak jomugan dituen olatu erreakzionario batean kokatzen dela. Epai honen ondoren, salaketa are eta irmoago egiten dugu: oldarraldiaren aurka, baina, batez ere, euskararen normalizazio eta biziberritzearen alde.”

Hitz egiteko txanda eman ondoren bildutakoek ondorengo iritziak aurkeztu dituzte:

Eva Alvarez Atanes (Socialistas Vascos-Euskal Sozialistak): “Nosotros estamos en contra. No nos vamos a adherir a esta declaración institucional porque, respetamos las decisiones judiciales, porque los socialistas vascos votamos en contra de esta ley porque en su día también se advirtió que algunos artículos de esta ley podrían ser anticonstitucionales. Esta sentencia lo confirma porque dice que la documentación no tiene que ser redactada sólo en euskera. Los socialistas siempre hemos estado a favor de la defensa de los derechos lingüísticos. La ciudadanía tiene derecho a dirigirse a la Administración en la lengua que libremente elija sin ningún tipo de imposición. El aceptar que toda la documentación de una Institución se pueda redactar en una sólo lengua supone ir en contra de los derechos lingüísticos. Los jueces interpretan las leyes y nosotros tenemos que llevar a cabo un Plan para poder mejorar el uso del euskera, pero esta sentencia no ataca esta posibilidad.”

Wesley Aritz Corsitto Agirre (ELKARREKIN PODEMOS EZKER ANITZA / IU-ALIANZA VERDE) “Nik honen inguruan gogoeta sakona egin dut eta alde batetik dut bihotza eta bestetik burua. Pena handiz hartu dut hau. Pertsonalki ez zait batere gustatzen baina egia da urte batzuetatik hona datorren jokaera ikusita, pixka bat aurreikustekoa zela. Guk uste dugu testuingurua garrantzitsua dela. 2012-2016 arteko legealdian, Carlos Urquijo jauna, Gobernuaren delegatua zela, udal pila bat auzietara eraman zituen euskaraz egiteagatik. Horri aurrera

egiteko Udal legea ateratzea lortu zen 2016. Atera bezain laster Estatuaren Abokatuak (Macarena Olona anderea), iragarri zuen konstituzioaren aurkakoa izateko arrazoiak zeudela. Jaurlaritzak, Espainiako Gobernuarekin adostasun politikoa lortu zuen auzietara ez eramateko. Instituzionalki, oso ondo baina horrek ez zion atea ixten inolaz ere edozein pertsona edo partidu politikoari (kasu honetan VOX izan da eraman duena), auzietara joateko. Egia da aterki juridiko sendorik gabe geratzen ari garela Administrazioan euskara normalizatzeko. Hiru puntu ezberdinei eraso egiten zaie: langileei eskatzen zaizkien hizkuntza eskakizunak, Administrazio publikoetan diharduten enpresetako hizkuntza irizpideak eta azkena hau, udalen barne funtzionamendua.

Epai hauetako adibide batzuk: 2021eko maiatzean Euskal Autonomia Erkidegoko Auzitegiak hiru udaltzainei euskara eskatzea diskriminatzailea dela esan zuen, 2022ko otsailean Gasteizeko Epaiak, 45 urte baino zaharragoak ziren funtzionarioei euskara eskatzea galarazi zuen, aurtengo urtarilean Barakaldoko udalarekiko emandako epaia azpi-kontratazioko langileei euskaraz jakitea eskatzeagatik eta baita ere martxoan Uliazpi fundazioko 34 langileen kontratazio prozesuan 32 langileek euskaraz jakitea baita ere diskriminatzailea dela esan zuen.

Joera hau ikusita, zoritxarrez orain atera den epaia denbora kontuan zen. Nork daki igandean zer gertatuko den. Posible da gobernu aldaketa bat egotea eta oldarraldia oraindik handiagoa izango da. Beraz, guk uste dugu lege-aldetik Madrilek erabakitzen du zer den legezkoa. Gure aburuz agian egin beharko lirateke euskara normalizatzeko ekintzak beste eremu batzuetan. Benetan inolako arazorik sortu ez dezaketen eremutan. Adibidez, udal euskaltegiak sustatu, euskaraz ikastea ordaindu. 2022ko uztaillean atera zen ikus entzunezko legea, baina ez da betetzen. Lege horrek esaten du, RTVEk ateratzen dituen 12 urtetik beherako edukiak, euskara, katalana eta galegoa itzulita eman behar direla. Lege hori paper bustia da eta badugu tresna juridiko bat hori bete arazteko. “Pantailak euskaraz” eta “Administrazioan euskaraz”-ek ere askotan salatu du EITBen egoten den euskarazko gabezia serie eta pelikulen inguruan. Katalunian adibidez, urtean 600 eduki baino gehiago igotzen dira streaming plataformetara. Hemen zoritxarrez, ez gara horrelako ezertara gerturatzen. Duela pare bat egun ere irakurri nuen Google-k euskarari egiten dion diskriminazioa.

Adierazpenarekiko, gu abstenitu egingo gara.”

Alkatea andreak (EAJ-PNV): “Gauza asko esan dira. Gure aldetik Espainiako Auzitegi Konstituzionalak emandako epaiaren inguruan salaketa irmoa. Hobeto edo okerrago, urtez urte erakunde ezberdinek emandako hizkuntza politika guztiak puskatu nahi dituzte eta oztopoak besterik ez dituzte jartzen. Gizarteak, batetik, normalizaziorako prozesuak modu naturalean hartzen duela esan dezakegu eta bestetik ditugu Auzitegiak, hizkuntza gutxituak oztopatzea helburu duten baliabideak erabiltzen dituzte eta hau izan da horietako bat. Guk gure salaketarekin irmo jarraituko dugu eta tokatzen den tokian hau salatuko dugu. Azaroaren 4an egongo den elkartze horrekin ere bat egiten dugu. Hamarkadaz hamarkada, euskararen alde lan egiten duten aurka hartzen dugu Auzitegi Konstituzionalak emandako sententzia hau.”

Hasier Agirre Elkoroberezibar jaunak (Beasaingo EH Bildu): “Oso adierazgarria da zein jendeak bultzatuta iritsi garen epai honetara (Urquijo, Macarena Olona, VOX). Herritar guztiek dute eskubidea gazteleraz ere jasotzeko eskubidea, UEMAko udalerrietan ere bai. Ez dago udalik informazioa erdaraz eskatuta ematen ez denik. Hizkuntza gutxituen behar dute borroka alde guztietan, kalean, telebistan, udaletan, erakundeetan. Gutxitu hitzak dena esaten du. Gure ustetan oso salagarria da oldarraldi hau eta erabat babesten dugu kontseiluak egindako adierazpena. Azpimarratu eta garrantzia eman nahi diogu azaroaren 4ko mobilizazioari, oldarraldi horri erantzun masiboa emateko aukera delako. Guk uste dugu euskarak, hori eta gehiago ere behar duela.”

Eva Alvarez Atanes (Socialistas Vascos-Euskal Sozialistak): “Nuestro voto no es por apoyar a las personas a las que se ha hecho mención. Hemos dado nuestras razones. Cuando se aprobó la Ley pusimos en duda la constitucionalidad de la misma. Aquí se está hablando de cumplir la Constitución. Somos partidos constitucionalistas y estamos en un Estado de Derecho. La Sentencia de lo que está hablando es de la inconstitucionalidad del art. 6,2 sobre el uso exclusivo del euskara en la documentación interna de la entidad local. Yo creo que las administraciones lo harán de una manera u otra. Esta Administración ha respetado bastante el uso de ambas lenguas cooficiales. Vosotros habéis hablado de que recibisteis un informe técnico en castellano. Nosotros lo recibimos, casi siempre, todo en euskara, pero no por ello hemos puesto el grito en el cielo.”

Alkatea andreak (EAJ-PNV): “Hasierrek esan duen harira, herritarrek bi hizkuntzetan jarduteko eskubidea bermatuta dago. Txostenak euskaraz bakarrik ez. Beste gauza bat da euskarari lehentasuna eman nahi diola udal honek eta lehenengo hizkuntza beharbada, euskara da. Hala ere bide horretan, lehen ikusi den bezala, badugu zer egiteko eta aurrera pausoak emateko. Baina herritarren eskubideak bermatuta daude. Administrazioarekin erlazioa, beraiek nahi duten hizkuntzan izango da. Askotan pasatzen da nire hizkuntza eskubidea urratzen dela bestearenak hartzen badu bere bidea. Beharbada norbaitekin tratatzeko erdaraz hitz egin behar dut. Hortaz, nire hizkuntza eskubidea, hor urratzen da.”

Hasier Agirre Elkoroberezibar jaunak (Beasaingo EH Bildu): “Osakidetza joaten garenean eta medikuak euskara ez dakienean?. Berdin ertzain batenarengana zuzentzen garenean edo administrazioetako langileren batenarengana eta tamalez, ez euskara ez dakitenean, non geratzen dira hizkuntza eskubideak?. Nork bermatzen ditu hizkuntza eskubide horiek?. Konstituzionalak?.”

Wesley Aritz Corsitto Agirre (ELKARREKIN PODEMOS EZKER ANITZA / IU-ALIANZA VERDE): “Nik esan nahi nuena zen, zorionez uste dugula epai honek ez dituela herritarren hizkuntza eskubideak urratzen zeren eta azken finean udalen dokumentazioari buruzko da eta ez, harremanei buruzkoa. Egia da beste batzuekin (ertzaina, Osakidetza,...) euskaraz hitz egin ahal izateko arazoak daudela. Legeak aurrera ateratzen ditugunean, euskarak merezi du, gure aldetik, ahalik eta indar gehiena egitea eta a ahalik eta zailena jartzea auzitegiei horrelako legeak atzera botatzeko. Kasu honetan, juridikoki arazoa da artikulua horrek esaten duela “...*baldin eta behar bezala alegatzen bada*”. Pertsona batek euskaraz ez dakiela alegatu beharra, juridikoki absurdoa da. Normalean, pertsona batek alegatzen du zer edo zer dakiela. Ez, ez dakiela. Horrek zoritxarrez eman dio sarbidea Auzitegi Konstituzionalari eman duen epaia emateko. Pentsatzen du jende asko ibili zela Legea hau lantzen, baina dena pikuetara joaten da, hein batean, teknizismo batengatik. Beste gauza da oldarraldi hau, baina beti dinamika baten helmugan egon den ondorioa da. Ez da ezer berria. 20 urte euskararen Legea atera zenetik eta daramatzagu 40 urte beti borrokan eta ziur aski beste urte pila bat horrela jarraituko dugu.”

Hasier Agirre Elkoroberezibar jaunak (Beasaingo EH Bildu): “Pixka bat kezkatzen dit euskararen oldarraldi hau zerbait tekniko edo juridikoa dela planteatzea. Niretzat zerbait politikoa da erabat. Mila eraso egon dira, EGUNKARIArena argiena. Planteatzea zerbait tekniko eta juridikoa dela, nire ustetan ez da zuzena. Hori izango da eraso horretan beste pauso bat, baina hemen arazo politikoa dago”.

Gaia behar adina eztabaidatu ondoren, bozketa egin da eta ondorengo emaitza lortu da:

Aldeko botoak: 14 (EAJ-PNV, BEASAINGO EH BILDU)

Aurkako botoak: 2 (Socialistas Vascos-Euskal Sozialistak)

Abstentzioak: 1 (ELKARREKIN PODEMOS EZKER ANITZA / IU-ALIANZA VERDE)

Horren ondorioz, gehiengo osoarekin onartu da erakunde-adierazpena.

5.- BERRI EMATEA:

Ezagutzera eman dira ondorengo Ebazpenak.

- 2023-05-15etik 2023-07-16ra bitarte emandako Ebazpenak.
- 2023-05-15etik 2023-07-16ra bitarte emandako Ebazpenak kontratu txikiei buruz.

6.- ESKAERA ETA GALDERAK

Eskaera eta galderen atalean honelakoak aurkeztu dira:

OSAKIDETZA

Hasier Agirre Elkoroberezibar jaunak (Beasaingo EH Bildu): “Bozeramaile taldean ere komentatu genuen, azkenaldian Osakidetzan gertatzen ari dena. Medikuek erretiratzen ari dira eta jendea falta da eta herri txikietan (Itsasondo, Ataun), jendea kezkatuta dago. Beasainen ere badugu arazoa. Gutxienez bi mediku jubilatuta dira eta ez dira ordezkatu. Udal honen eskumena ez da, baina bai, herritarrek jasotzen duten ondorioa. Hori dela eta uste dut udal honi dagokiola galdetzea eta eman beharreko pausoak ematea.”

Alkate andreak (EAJ-PNV): “Bozeramaile taldean esan bezala, bi mediku jubilatuta dira eta beraien pazienteen kartera besteen artean banatu da. Harreman zuzena badugu hemengo ordezkariarekin eta dituztenen aurreikuspen inguruan hurrengo bozeramaile taldean komentatuko ditugu.”

Eta tratatzeko besterik ezean, bilera arratsaldeko seiak eta hogeita hamar minututan amaitu da eta nik, idazkari naizen honek akta hau idatzi eta sinatu dut.